

Kehidupan di dunia akan terasa nikmat jika kita memanfaatkan kurniaan-NYA. [GAMBAR HIASAN]



Nikmat kehidupan

Laburkan usia panjang untuk buat kebajikan

Nikmat kehidupan yang dikurniakan adalah gambaran bahawa Allah SWT amat mengasihani dan menyayangi hamba-Nya. Kesusahan hilang dengan kesenangan, kejahatan lenyap dengan pengetahuan, kesakitan terhapus dengan kesihatan dan kegelapan berganti gemerlapan.

Terlalu banyak nikmat yang dilimpahkan kepada isi dunia ini, tinggal lagi kita memanfaatkan setiap satunya dengan harapan untuk mendapat keberkatan daripada-Nya. Ada cuba menghitung nikmat, membandingkannya dengan kesusahan hidup dihadapi, ternyata kemewahan yang Allah kurniakan tidak terkira dengan jari.

Berusaha cari kesenangan

Nikmat melihat, mendengar, merasa, berfikir malah berkongsi kehidupan dengan penuh kasih sayang sesama

makhluk Allah yang lainnya tidak akan diperoleh jika tiada kuasa yang menganugerahkan.

Tentulah kita tidak boleh menyesali kepayahan dan kesukaran hidup di dunia, malah anggaplah ada hikmah yang menanti sementara iman diuji, tetapi berusaha untuk mencari kesenangan.

Firman Allah SWT: *“Dan jika kamu menghitung nikmat Allah yang dilimpahkan-Nya kepada kamu, tiadalah kamu akan dapat menghitungnya satu persatu. Sesungguhnya Allah Maha Pengampun lagi Maha Mengasihani.”* (Surah An-Nahl, ayat 18)

Ada kala kita tidak sedar apa yang dimiliki hari ini adalah nikmat, bukannya sedia ada untuk setiap manusia kerana ada yang tidak dapat merasainya. Sebab itu kita tidak harus lupa mensyukuri kemurahan hati Allah SWT menganugerahkan kehidupan lengkap buat makhluk-Nya di bumi.

Namun, ada kemudahan yang Allah sediakan tidak dapat dimanfaatkan akibat sikap manusia juga yang tidak tahu menghargai nikmat. Sikap manusia yang mudah lalai dan lupa menyebabkan nikmat yang dikurniakan tidak memberi apa-apa faedah

kepada mereka.

Buat kebajikan

Usia yang panjang sepatutnya diisi dengan kebajikan dan faedah kepada diri sendiri serta orang lain tetapi dihabiskan kehidupan daripada awal hingga saki bakinya dengan judi dan zina. Tidak pula terkilan dengan kezaliman dan kejahatan dilakukan.

Rasulullah SAW bersabda: *“Tidak berganjak kedua kaki seorang hamba pada hari kiamat sehingga ia disoal mengenai umurnya pada perkara apakah ia habiskan, dan ilmunya untuk apakah ia gunakan, dan harta bendanya dari manakah ia peroleh dan pada apakah ia belanjakan, dan tubuh badannya pada perkara apakah ia susutkan kemudaan dan kecergasannya.”* (Riwayat Al-Imam At-Tirmizi)

Adanya tenaga dan akal gunalah untuk mencari rezeki yang halal. Apa salahnya merasa nikmat yang Allah berikan percuma untuk dilaburkan bagi mendapat nikmat lainnya. Buat orang yang berhati-hati menjaga amanah Allah SWT, mereka tidak akan alpa dengan kemewahan dunia.

Mereka tahu semuanya adalah

pinjaman sebaliknya mereka berusaha meningkatkan limpahan rahmat dan nikmat supaya dapat dikongsi dengan orang lain yang kurang berkemampuan untuk memanfaatkan nikmat itu.

Allah berfirman: *“Dan ingatlah bahawa kehidupan dunia ini meliputi segala kesenangan dan kemewahannya, jika dinilai dengan kehidupan akhirat tidak lain hanyalah ibarat hiburan dan permainan: Dan sesungguhnya negeri akhirat itu ialah kehidupan yang sebenar-benarnya, kalaulah mereka mengetahui hakikat ini tentulah mereka tidak akan melupakan hari akhirat.”* (Surah Al-Ankabuut, ayat 64)

Orang yang tidak lupa hari akhirat walaupun dunia ini menjanjikan seribu kemewahan tidak membazirkan nikmat Allah dengan keangkuhannya sebagai manusia kerana kurniaan nikmat dunia demi menuju kehidupan akhirat yang lebih senang dan mewah.

Sambutan ulang tahun kelahiran yang saban tahun diraikan haruslah dijadikan kayu pengukur sama ada nikmat usia yang dikurniakan benar-benar kita hargai. Dengan jantung yang masih berdegup, adakah kita terus menjadi hamba yang taat atau ingkar.

Jaga hubungan sesama insan

Adakah kita menjaga hubungan sesama insan dengan baik atau kita menyusahkan orang lain, adakah kita banyak memanfaatkan kurniaan Allah atau kita membinasakannya dan adakah kita berbaloi diizinkan terus bernafas?

Rasulullah SAW bersabda: *“Dari-pada Abdul Rahman bin Abi Bakrah daripada ayahnya, seorang lelaki telah berkata: Wahai Rasulullah! Siapakah sebaik-baik manusia? Berkata Rasulullah: Sebaik-baik manusia ialah orang yang dipanjangkan umurnya dan umur itu dipergunakan untuk berbuat kebaikan. Berkata lelaki itu lagi: Siapakah sejahat-jahat manusia? Maka Rasulullah berkata: Sejahat-jahat manusia ialah orang yang dipanjangkan umurnya tetapi digunakannya untuk berbuat kejahatan.”* (Riwayat Al-Imam At-Tirmizi)

AYAT AL-QURAN

“Dan jika kamu menghitung nikmat Allah yang dilimpahkan-Nya kepada kamu, tiadalah kamu akan dapat menghitungnya satu persatu. **Sesungguhnya Allah Maha Pengampun lagi Maha Mengasihani**”

Surah An-Nahl
Ayat 18



NIK SALIDA SUHAILA

Pensyarah Kanan
Fakulti Syariah dan
Undang-Undang
Universiti Sains
Islam Malaysia